

Tumba contest 2012 ta dedica na Richard "Tattoo" Quant

Biografia Richard "Tattoo" Quant

Richard Erwin Quant, mihor conoci como Tattoo ta naci 22 maart 1968, bow di e signo di Aries cu yega di presenta riba un nivel internacional. Prome cu Tattoo a bira conoci den mundo di musica y cantamento, e tabata e top break dancer den e aña nan 80. Su carrera musical a cuminsa cu agrupación "Boys Next Door" dirigi pa Anthony Gario. Na unda den un talento escolar na Club Visage a sali maximo ganador absoluto e anochi ei. Den e banda aki el a graba su prome grabacion, un reggae bao di nomber di "Come back darling".



Na aña 1988, Tattoo a biaha pa St. Maarten pa representa Aruba den Calypso Contest di Antiyas. El a logra sali e cantante mas popular di e festival y tambe e la termina di segundo lugar di e contest aki. Durante cu e tabata forma parti di Boys Next Door e la presenta su promer tumba cu ta titula "Nos Carnaval" pero respalda pa Musical Time. Poco tempo despues el a bay forma parti di e banda musical "Musical Time". Hunto cu e banda, Tattoo a bin gana varios titulo di Tumba, Calypso y Roadmarch. Na 1991 tabata e prome biaha cu el a wordo titula "Rey di Roadmarch" cu e cantica "Slide and Duck". Den e mesun aña el a sali na e di dos lugar cu e tumba inmortal "Indian". Na 1992 el a logra gana e titulo di "Rey di Tumba" cu "Candela" y "Rey di Calypso" cu "and so What". Tattoo ta unico persona cu den 58 aña di carnaval a logra tur tres corona nan di Tumba, Calypso y Roadmarch. Su carrera musical a sigui florece, no solamente local pero tambe internacionalmente cu diferente presentacion na Venezuela (den e certamen di Miss Venezuela), e festival di "Calle 8" na Miami, Florida na merca, Republica Dominicana, Colombia, St. Maarten, Curaçao, Bonaire, y Hulanda.

Despues di bandona "Musical Time", Tattoo a wordo pidi pa forma parti di "Super Orquesta Quasi" bao maneho di Meiller Lourens (Q.E.P.D.). Cu e orquesta aki, Tattoo a bin graba varios tema nan cu te awendia ta bon conoci. Tema nan manera "Macho Criollo", un son montuno canta hunto cu Ramphis Tromp, otro cantante formando parti di "Super Orquesta Quasi" na e momento ey. Otro duet cu a hasi un impacto ta "Laga mi Merlin" canta hunto cu Gibi Duran di "Gio Fuertísimo". Sigur nos no por lubida un otro éxito di e banda aki canta door di Tattoo, roadmarch pegajoso "Back and Front". Keto bai e cantica aki ta pone hende bira loco cu a bira un di e classico di e historia di Roadmarch.

Mientrastanto hayando diferente oferta pa canta na diferente lugar, individualmente Tattoo tambe a haya varios oportunidad di comparti e escenario na diferente concierto y festival nan di Jazz cu artista nan grandi manera Celia Cruz (q.e.p.d.), Tito Puente (q.e.p.d.), e bajista Stanley Clark, George Benson, Marc Anthony y varios otro artista nan. Den mesun tempo, Tattoo a graba un disco compacto di merengue cu e banda "Raiz" na Republica Dominicana. Despues di tempo corto cantando y tocando freelance den hotel, na 2005 Tattoo a wordo acerca pa bin forma parti di "Zeta Band" bao maneho di Angelo Anthony. Tattoo a sigui cu e mesun smaak y a cuminsa composita algun cantica manera "Sue", "Aceptami manera mi ta", "Bon Zeta" y e hit grandi na e momento aki "No biba mi bida". Na juli 2007, "Zeta Band" a lansa su prome disco compacto bao titulo "Cuidow bo slip". Tattoo hunto cu "Zeta Band" ta cosechando basta éxito tanto na Aruba pero tambe na Corsow y Bonaire. Na Bonaire, dia 1 di December 2007, "Zeta Band" a presenta hunto cu "Happy Band" di Bonaire y "Mais" di Corsow den un fiesta bailabel di back to the 80's grandi cu a trek e pueblo di Bonaire den su totalidad.

Richard "Tattoo" Quant ta otro ehempel cu si bo ta pone meta bo dilanti y traha pe, lo bo por logra nan tambe. Tattoo, un persona hopi social, cu bon curazon, un artista local di un isla chikito pero cu un carrera musical grandi. Aruba por ta orguyoso di tin un artista di tal caliber cu keto bay ta presentando y dunando su parti pa engrandece nos cultura y nos musica local riba un nivel internacional.